

Relaciona cu Base Militar Mericano: Ministro di Defensa Hulandes kier bin pone orden

ORANJESTAD.(AAN): Ultimo tempo por a constata cu tin diripiente varios ministro Hulandes ta mustra masha interes pa Antiyas y muy en particular Aruba.

Fuentenan yega a duna di conoce cu posiblemente tur e movecionnan aki di gobierno Hulandes lo ta en conexion cu

e delegacion pa cu e base militar Mericano cu Merca kier establece muy en particular na Aruba.

Hulanda lo ta prefera cu e base militar aki worde poni na Curacao ya cu nan lo por tin mas control y vigilancia den henter e desarojo nobo aki.

Mientrastanto ministro di justicia Antiyano Mr. Martha

lo ta dunando e Mericanonan tur cooperacion pa nan lo por opera den territorio di Antiyas.

E tactica aki lo ta costa Antiyas ningun cen preto.

Mientras tin un kustwacht cual tanto Aruba y Antiyas mester pomp bastante placa pa mantene esaki riba awa y na mesun momento ta Hulanda so ta dicta pa 100% den esaki.

Ta na cua parti di mundo un gobierno ta paga pa algo cu e no tin nada di bisa den dje?

Observadornan politico ta haya cu si Antiyas kier sigui mantene su territorio nan lo mester inverti den nan soberania y dicta riba nan mesun territorio.

Segun e plan Mericano, nan lo por patruya, detene y pasa esnan involvi den actonan ilegal den awanan territorial di Antiyas pa autoridadnan local, pa procesa e proceso hudicial penal sin ningun costo involvi.

Mientras e plan di Hulanda ta cu tur gasto mester cay riba cuenta di Antiyas y Aruba.

Apenas Antiyas y Aruba por carga nan propio gasto-

nan y riba dje nan mester bay paga pa loke Hulanda kier y ni Antiyas ni Aruba tin algo di bisa den nan mesun awanan territorial.

En conexion cu e bishita relapago cu e ministro di defensa Hulandes Mr. De Grafe ta bin haci, tin fuerte sospecho cu e puntanan ariba menciona lo ta e topico cu e lo kier discuti.

Manera ta conoci, te ainda gobierno di Aruba no a duna su opinion abiertamente relaciona cu entre otro e asunto di establecimiento di un base militar Mericano y tampoco e forma cu Hulanda kier pa tanto Antiyas y Aruba hinca miyones den e proyecto di Kustwacht.

Mas ainda ni Aruba ni Antiyas no tin nada di bisa.

Ta di spera cu nos mandatarionan prome cu yega asina leu pone Staten bon na altura di e intencionnan di e ministro di defensa Hulandes pa no stroba e establecimiento di un base militar Mericano na Aruba.

Manera ta bon conoci tin raport a wordo traha caba y segun informe cu Aruba ta e

opcion di e Mericanonan pa pone nan facilidadnan di infraestructura militar.

Si esaki tuma lugar esaki lo duna nos economia un empuhe grandi.

Pueblo mester worde consulta tambe di e proyecto aki y mester pone condicionnan bon hancra den un tratado cu mester worde inscribi na Nacionnan Uni pa evita cu Aruba no sali di panchi cay den candela y na lugar di mantene su soberania y autonomia no perde saco cu cangreu y tur.

Pa basta aña caba, Diario a trece dilanti y a para tras di cu un base militar Mericano lo faborece Pais Aruba.

E ora zero ta yegando pa decision grandi bay tuma lugar.

Ministro Junior Croes e ultimo dianan sigur lo ta preparando pa hasi tur esfuerso relaciona cu e cambian grandi aki dilanti porta.

Segun informe cu e lo viaha tambe pa Merca aparentemente relaciona cu e establecimiento di un base militar Mericano na Aruba.

Atrobe tin metemento den cartera di Ministro Beke

ORANJESTAD.(AAN) Ministro Lili Beke tin algo straño cune pasobra den cualkier proyecto cu e pone su hendenan y su mes traha riba dje, nan ta haya cu ministronan y hendenan di partner di coalicion ta bay mete la pata.

Tempo cu ministro Beke tabata ministro di deporte, pais Aruba a conoce 6 otro ministro di deporte, fuera di ministro Beke mes y kico e otronan a logra riba e tereno cu no tabata di nan?

Nada pasobra ta un fracaso tras di otro nan a hinca den otro.

Recientemente ta prome ministro di Aruba a bay mete riba tereno di ministro Beke kende actualmente ta encarga cu entre otro Asuntunan Economico y prome ministro a bay bisa pueblo con economia di Aruba lo bay worde cambia, haciendo como si fuera cu ministro Beke mes no tabata capacita pa bisa loke tin na plannan riba mesa.

No ta prome ministro so ta mete riba tereno di ministro Beke, pasobra tin mas ta mete la pata tur caminda y asina e mesun storia di postema ta sigui fomenta te ora cu esaki rebenta manera un blufein mahos.

Aparentemente tin un otro escandalo na caminda cu pronto lo bay rebenta y cu tin strobamento formal di e trabao di ministro Beke.

E otro ministronan no ta compronde cu ministro Beke kier alivia e pueblo cu ya caba no por wanta mas y cu ministro Beke cueste loke cueste no kier pa pueblo bay paga un aumento di seguro cu no ta hustifica?

Esnan cu ta strobando ministro Beke den su lucha pa drecha turismo y drecha economia di Aruba mester

haci esaki publicamente, pa asina pueblo haya sa ta kende nan ta y pa den temporada di eleccion pueblo saca su conclusion.

Un hende por wanta hopi, pero awor si a bira dimas.

Pueblo di Aruba ta sosteniendo ministro Beke den su lucha pa para e aumento di seguro y oposicion tambe ta den e lucha aki pa para e aumento di seguro di auto y ta cu ki cara y cu ki hustificacion otro ministronan ta bay boycotea esaki?

IN HOLLAND STAAT EEN HUIS!!

